

Kalaallit Nunaanni pinerluttulerinermi inatsisip aamma Kalaallit Nunaanni eqqartuuussisarneq pillugu inatsisip (Kinguaassiuutitigut pinerluttarnerit il.il.) allanngortinneri pillugit inatsisissatut siunnersuummut missingiummut Namminersorlutik Oqartussat isumaqataanissaat pillugu Inatsisartut aalajangiiffigisassaattut siunnersuut

Saqqummiussissut

(Isumaginninnermut, Ilaqtariinnermut, Naligiissitaanermut Inatsisinillu Atuutsitsinermut Naalakkersuisoq)

1. Siullermeerneqarnera

Aalajangiiffigisassatut siunnersuut manna pinerluttulerinermi inatsimmi eqqartuussisoqarnermilu sulineq pillugu inatsimmi kinguaassiuutitigut pinerluttarnerinut tunngassuteqartoq Naalakkersuisut saqqummiussinnaagamikku nuannaarutigeqaat.

Misissuinerit erseqqissumik takutippaat kinguaassiuutitigut pinerluttarneq nunatsinni ajornartorsiutaasoq annertoorujussuaq, pinerluutinullu allanut naleqqiullugu kinguaassiuutitigut pinerluttarneq pinerluffigineqartunut annertunerpaamik kinguneqartartunut ilaasoq. Kinguaassiuutitigut atornerluisarnerit akuttunngitsumik ilaqtani qanigisariinni isertuutumik pisarpoq. Ingammik annilaarnarpoq meeqqavut inuusuttavullu taamak amerlatigisut meeraanermanni atornerlunneqartarmata nalunngilarpullu atornerluinerit amerlanerpaasa unnerluutigineqarneq ajortut.

Pinerluttulerinermi inatsimmi kinguaassiuutitigut pinerluttarnerit pillugit inatsisit pingarnertut siunertarai inuup kinguaassiornermik kiffaanngissusaata namminerlu aalajangiisinjaassusaata illersornissaat. Taamaammat inatsisit ullutsinnut, nalgisami isumaliortaatsimut aammalu inuiaqatigiinni nutaaliaasuni aaqqissuusaanerannut naleqqunnissaat pingaaruteqarpoq.

Inatsisissatut siunnersuut aqqutigalugu pinerluttulerinermi inatsimmi kinguaassiuutitigut pinerluttarnermut immikkoortortaanni oqaatsit atorneqartut ullutsinnut naleqqunnerusunngussapput, taamaalilluni inatsisitigut maleruaqqusat paasiuminarnerulernissaat qulakkeerneqassaaq. Oqaatsit atorneqartut erseqqissarnerisa saniatigut inuiaqatigiinni paasinnittariaatsimut nalinginnaasumut aammalu inuiaqatigiinni nutaaliaasuni unammilligassatsinnut tulluarsarlugit aalajangersakkat arlallit atuuffissaat iluarsiiffigineqarput.

Siunnersuummi kinguaassiuutitigut pinerluttutut isigineqalersussat amerlineqarnissaat siunniunneqarpoq tamanna ilaatigut pissaaq ullumikkut unioqqutitsinerunngitsut pinerlunnertut isigineqalersillugit inatsisitigullu maleruaqqusat annertunerusut allat assersuutigalugu pinngitsaaliilluni atoqateqarnermut aalajangersakkap atuuffiisa annertusinerisigut.

Siunnersuutip pingarnertut kinguaassiuutitigut pinerluttarernut atatillugu inatsisitigut atugassarititaasut erseqqissassavaa taamaalillunilu nalunaarutiginnitarnernut innuttaasunullu ataasiakkaanut illersuilluarnerunissamut toqqammaviussalluni.

Kinguaassiuutitigut pinerliisoqarsimatillugu inatsisit sinaakkutai suunersut siunersuutip pingaarnertut ersarinnerulersitseqataaffigissavai, taamaalilluni unnerluutiginninnerit amerlanerulissapput aammalu innuttaasut ataasiakkaat illersorneqarnerulissallutik. Inatsisisstatut siunnersuutip saqqummiunneqartup erseqqissumik nalunaarpaa kinguaassiuutitigut pinerluttarnernut tunngatillugu suut unioqqutitsinerusut suullu unioqqutitsinerunngitsut. Pissutsit allanngortissagutsigit ilaatigut pinerluffigineqarsimasut, qanigisat innuttaasullu allat ernumassuteqartut atornerluisoqarsimatillugu imaluunniit atornerluisoqarsorisoqarsimatillugu politiinut pisortanulluunniit nalunaarutiginnissinnaanerat inatsisitigut paasuminarnerussaaq ajornannginnerulersinneqarlunilu, ingammik meeqqanik atornerluisoqarsimagaangat pinngitsaaliisoqarsimagaangalluunniit.

Inuiaqatigiinni ajornartorsiut ilaqtariinnut eqqugaasunut aserorterinerpaasumut akulikitsumillu kinguaariinnut sunniuteqartartumut akiornissaannut inatsisisstatut siunnersuutip pingaarutilinnik atortussaqalersissavaatigut.

Tamatut oqaaseqarlutik Naalakkersuisut oqaluuserisassaaq Inatsisartunut oqaluuserisassanngortippaat.